



國家清史編纂委員會・文獻叢刊

六編

清代稿鈔本

第二八三冊

國家清史編纂委員會·文獻叢刊

六編

清代稿鈔本

第二八三冊

廣東省立中山圖書館
中山大學圖書館

編

主編 桑兵
副主編 李昭醇 程煥文 劉洪輝

SPM

南方出版傳媒
廣東人民出版社

·廣州·

第二八三冊目錄

京報摘鈔

京報摘鈔

不分卷

同治十年四月至光緒二年四月

佚名輯

鈔本

同治十年四月十六日京報

兩廣總督瑞麟

再卸署廣東翁源縣事候補知縣莫東奎前因隨剿翁源縣屬徐鄉土匪出力彙入總兵卓興方耀等軍克復福建永定武平及廣東長樂嘉應等城保獎案內 奏奉 上諭著以本班儘先補用欽此當行轉經遵照嗣據該員稟稱先於同治元年奉委管解京倉米價銀兩案內經吏部核題請以本班儘先補用奉 旨依議欽此惟此次獎叙與前次議叙相同應請將再次所得本班儘先補用 奏請註銷另行改獎等情當經批飭善後總局司道核明詳請具奏前來奴才伏查候補知縣莫東奎先因管解京倉米價銀兩奉准議以本班儘先補用是再次所保係屬重複可否仰祈 聖慈將候補知縣莫東奎改為候補缺後以應升之缺升用出自 逾格鴻施其再次所

得獎叙應請 旨註銷所有該員保舉重複擬請改獎緣由謹附片
陳明伏乞 聖鑒謹奏奉 旨吏部議奏欽此

同治十年四月十七日京報

山西巡撫臣何璟跪 奏為滙陳晉省困敝情形籲懇 天恩俯准
將文職養廉免扣三成鈔本銀兩以裕辦公而資整頓恭摺仰祈
聖鑒事竊維 國家設官分職復予養廉原使辦公有資潔清共勵
溯自咸豐六年間欽奉 旨飭酌增養廉案內經部臣 奏准將文
職養廉一二品酌給七成三四品酌給八成五品以下及七品之正
印官武職三品以上酌給九成仍按京官俸銀章程每兩以寶鈔二
串折給旋經前撫臣王慶雲 奏准酌給實銀每兩統扣二錢作為
鈔息其餘文職六七^品以下佐貳祿職及武職四品以下各官均以八
折現銀開放所餘二成一併提歸鈔息報撥嗣又接准部咨自咸豐
八年起養廉及一切祿支各款均以七折支放所扣三成現銀分季

解部專作京中鈔本等因所有各官廉內應扣減成及三成鈔本銀兩均經遵照扣撥在案惟查晉省自咸豐年來豫捻陝回蔓延滋擾甚至闖入晉疆所有沿疆當冲州縣逼近賊氛莫不增置器械僱練更丁辦理城防山河防幾無虛日固敢疎懈近年各路大軍雲集秦隴陝省北山人烟荒絕驛路不通凡湘淮皖豫諸軍以及東三省馬步各隊一切轉輸並採辦駝馬糧械東西南北無不取道於晉本省沿河防軍亦復時有移調故不獨當站各屬苦累不支即偏僻地方亦復疲于奔命州縣辦公全資養廉一欸而鈔本三成核計扣減已逾十載日有所墊即歲有所虧縱使挪新掩舊無非剝肉補瘡以致廉潔之員反虧巨欸稍優之缺亦便瘠區若不稍加體恤於地方一切公務勢必動虞掣肘且墊辦防務支應兵差往往時當倉猝事

在急需物價增長兼之例外供支及例銷不敷之款不一而足此等
用項雖未逐件奏明均經前撫臣督同司道分別核刪酌准有案現
因限於部章既不准作正開銷致糜國帑復不准勸捐歸補貽累商
民若一切悉令追賠則從前急公任事未免同慨向隅而此後軍務
要差更恐藉口貽誤查山東河南軍需報銷各案凡州縣勇糧兵差
與例未符別歸外銷之款均由文職養廉攤扣歸補既以體恤下情
亦可無虧正項節經部臣核准而晉省奉扣鈔本以來所有文職養
廉除扣軍需減成減平及本省年例常捐外道府以上所領無幾州
縣以下每至不敷分扣是軍需墊款雖欲設法外銷實苦無從籌補
日積月累為數已鉅即使一一叅追究於庫項無補現在鈔已停止
本無所用除雜支俸工等項現值庫項支絀原扣鈔本三成未敢概

請免扣外所有文職各官養廉應請自同治十年春季為始一律免扣三成鈔本以裕辦公而資歸補實於地方公務庫儲均屬大有裨益茲據藩司轉據太原等九府具詳由司核明請奏前來臣查前項銀兩原為鈔本而扣今鈔已停止似應免其扣解在部庫之盈絀原不較此錙銖而各屬之解支可藉資挹注自軍興以來山右地方苦累最久臣睹此情形不能不思設法調劑合無仰懇 天恩俯准將晉省文職養廉自同治十年春季起仍按扣定成數減平支給免予加扣三成鈔本銀兩以裕辦公而資整頓如蒙 俞允臣當嚴飭各屬將軍需一款從前例外供支趕緊設法歸補嗣後遇有用項不准擅自挪移如違嚴予叅辦其應辦防務兵差並飭認真經理不准藉詞推諉稍滋貽悞是否有當理合具陳伏乞 聖鑒訓示謹 奏軍機大臣奉 旨戶部議奏欽此

同治十年四月二十日京報

協辦大學士直隸總督一等伯臣李鴻章跪 奏為揀員升補海疆
要缺知府暨遺缺知府另行擬補恭摺仰祈 聖鑒事竊臣欽奉同
治九年九月十五日 上諭直隸天津府知府員缺緊要署該督於
通省知府內揀員調補所遺員缺著裕長補授欽此伏查天津府管
轄一州六縣地處海疆水陸交冲商民雜處現為北洋通商要口又
係京畿門戶撫綏表率彈壓巡防在在均關緊要必須熟悉洋情通
達政體之員方足以資治理查定例員缺緊要人地實在相需而所
保之員與例稍有未符必須詳細聲明專摺 奏請等語茲在通省
現任知府內逐加遴選非本任緊要即於此缺人地未宜一時實無
合例堪調之員未便稍涉遷就致滋貽悞惟查有本任安州知州道

員用現署天津府知府馬繩武年四十五歲安徽懷甯縣人由內閣
供事於道光三十年咨送 實錄館當差咸豐二年議叙以縣丞即
選五年捐升兵馬司正指揮七年議叙加三級派辦五城團防九年
揀發中城十年揀調南城派撫局差遣奉 旨著免補本班以知州
分發省分補用欽此十一年承辦奉天通商事務同治元年二月奉
旨以知州分發直隸補用嗣因辦理通商出力元年十一月奉
旨俟補缺後以同知直隸州用並加運同銜欽此三年十一月奉
旨賞加知府銜欽此四年六月辦理海運出力奉 旨俟補同知直
隸州後以知府升用欽此六年十二月隨辦通商海防出力奉 旨
賞加三品銜欽此七年八月津郡防剿捻匪出力奉 旨俟補缺後
免補同知直隸州以知府用賞戴花翎欽此八年前敵軍營出力

奉 旨俟補缺後免補知府以道員用欽此是年 題補晉州知州
九年五月調補安州知州六月因津郡民教滋事奏署今職業已遵
例捐免歷俸臣查該員廉明勤慎篤實慈祥洋務熟諳輿情愛戴自
上年夏間前督臣曾國藩委署至今將及一載於整頓地方隨辦通
商籌防諸務均能措置妥協凡遇中外交涉事件竭力調停持平剖
析尚中窾要以之升補天津府知府洵於海疆要地有裨惟該員本
係保舉補缺後以知府補用之員續因軍營出力 奏保免補知府
以道員用今以調缺知府缺出 奏請升補與例稍有未符而人地
實在相需例得專摺 奏請現據藩臬兩司會詳前來合無仰懇
天恩俯念員缺緊要准以馮繩武升補天津府知府俾臣稍資臂助
即地方大局亦可互相維持該員任內並無已起降革叅限處分所

有因公處分例免核計如蒙 俞允所遺安州知州選缺直隸現有
應補人員應請扣留外補至遺缺知府裕長業已到省現在天津府
知府以馬繩武升補自應將裕長留省遇有知府缺出不論繁簡酌
量補用查有 奏補大名府知府李興銳現經兩江督臣曾國藩
奏請開缺留於兩江差委奉 旨允准所遺大名府知府一缺應請
即以裕長補授以重職守是否有當伏候 聖裁所有揀員升補海
疆要缺知府暨擬補遺缺知府緣由理合恭摺具陳伏乞 皇上聖
鑒訓示遵行謹 奏同治十年四月十三日奉 上諭李鴻章奏揀
員升補要缺知府另行擬補一摺據稱天津地處海疆知府員缺緊
要馬繩武署任以來辦理妥協請准以該員補授等語天津府知府
著准其以馬繩武補授嗣後不得援以為例前經簡放之天津府遺
缺知府裕長即著照所請補授大名府知府該部知道欽此

同治十年五月壬子日京報

革職留任頭品頂戴雲貴總督臣劉嶽昭跪 奏為揀員請補要缺
同知恭摺奏祈 聖鑒事竊照准升雲南景直隸廳同知傳綸於同
治九年十二月十一日在省聞訃丁母憂業經撫臣具題開缺所遺
景東直隸廳同知係繁疲難三項相兼要缺例應在外揀選升調應
照例以該員聞訃丁憂之日作為開缺日期歸於是月底截缺係要
缺毋庸簽掣臣於通省應調應升人員內逐加遴選非現居要缺即
人地未宜一時實無堪以升調之員惟於應補人員內查有候補同
知行謙年六十四歲內務府廂黃旗雙順管領下漢軍舉人考取筆
帖式咸豐三年二月補授內務府都虞司筆帖式四年十二月簽掣
雲南新平縣知縣六年二月到省四月赴任調署昆明縣知縣題升

鎮沅直隸同知同治二年三月委赴四川提餉三年四月經前任雲南撫臣賈洪詔林鴻年留營差委四年七月隨臣在貴州行營差遣七年由撫臣岑毓英以久未回滇奏請開缺九年正月差竣旋滇經臣會同撫臣奏明該員委因在軍營差遣並無逗遛規避情事經部議奏仍以同知留於雲南歸候補班補用九年八月初八日奉旨依議欽此現署陸涼州知州臣查該員才具明練辦事老成請以補授景東直隸同知洵堪勝任與例亦符據藩司永延春臬司程誠會詳前來合無仰懇 天恩俯念員缺緊要准以該員衍謙補授景東直隸同知實於地方有裨如蒙 俞允該員係實缺同知開缺後仍以同知歸候補班補用之員俟獲准日照例給咨送部引見恭候欽定所有揀員請補要缺直隸同知緣由謹會同雲南巡撫臣岑毓英合